





# LaengoBarde 2018




E Füdliblüttler tuet füdliblüttle,  
är flitzt üb're Bäreplatz!  
Ihm hindenache schwinge d'Chnüttle  
füüf Tschugger, u mit em ne Satz  
chöi sie ne dingfescht mache,  
är chlagt: „Löht los, bi Gott,  
i halte mi, da gitt's nüt z'lache,  
doch a ds Verhülligsverbott!“  
*Wie mes o macht, seit dr Fasnachtsbär,  
Am Gsetz z'entspräche isch mängisch schwär!*



Am Fernseh hocke, we's tuet chutte,  
mir machen'is bequem,  
im Fauteuil luege wie si schutte,  
was gsehsch isch scho extrem:  
Da kicke schwarzi Manne,  
wie vom nen and're Stärn.  
Hei GÄLB-SCHWARZI Lybli u Turnhose ane,  
aber „SCHWARZ-GÄLB“ isch YB vo Bärn.  
*YB stiengi bös im Schilf  
Ohni schwarzi Entwickligshilf.*



D' Gurke si 30 Santimeter -  
u schnuergrad gwachsen ou.  
Dr Chopfsalat het nünzäh Bletter,  
nid meh, wüu süsch frisst ne ke Sou.  
Mir löh alls reglementiere,  
vo Brüssu, die gähn'is e Tip,  
sie meine mir Schwyzer heige z'regiere  
nach em „Cassis-de-Dijon-Prinzip“.  
*Mit Cassis und Wysswy macht me Kir,  
mit Cassis u Merlot e Bundesratsfyr.*



„Hütt schneits u ganztags schynt o d'Sunne  
 drissg Grad im Egelsee.  
 S'het Näbubänk u Ysch im Brunne,“  
 Verkündet e Wätterfee.  
 „Lut Twitter git's hüt Gwitter  
 -vor allem tags, - oder zNacht?“  
 So überzügend tönts, s'isch Shit, - s'isch Shitter,  
 we dr Trump Prognose macht.  
*Für die Vorussag nach Trump'scher Art  
 gwinnt dr Donald si **Fake-News-Award!***



Es Fahrverbot lampet nünzg Grad abe  
 fuf Äscht sy knickt am Haag.  
 En alti Dame im Strassegrabe  
 beklagt ihri schmärzvollli Lag.  
 Das isch nid d'Folg, mir wette,  
 vo so'm ne Hurrycan,  
 nei, bhüetis Gott - jitz muesch di rette,  
 vor em eBike-Raser-Wahn.  
*Mit Tämpo 50 gradus i Rank –  
 Z'mingscht mache sie das ohni Gstank!*



Mit ÖV reise, das syg schöner,  
 da hättsch gärn dini Rueh.  
 Doch mampft di Nachbar grad e Döner  
 lost Musig lut drzue.  
 „Los Schatz, i fahre uf Basel,  
 jetz isch grad Olte gsy“  
 So tönt rundume das Handy-Gfasel  
 u du bisch „live“ derby.  
*Däm Handy-Gschnurr chasch nid entflieh,  
 chasch nid emal dr Stecker zieh!*



E Chlapf zum Gring im Stadion  
 schynt hütt doch fasch normal.  
 Ja, schlegle ghört zum guete Ton  
 es wird scho bau fatal.  
 Am Spielfälrand zwe Flegle,  
 Es flüge d'Hobelspän;  
 ganz nach de neuschte Astandsregle  
 vom Christian Constantään!  
*Nid würklech wei sich zwe versöhne  
 Entsprechend de o d'Gläser töne.*



S'git Lüt die bhaupte: ds Dütschland chouffe  
 Chönntsche Filme für weniger Gäld,.  
 U Sport würdi beliebig louffe\_  
 Vor Schwyz u der ganze Wält.  
 Du muesch uf nüt verzichte,  
 nid uf ‚Glanz und Gloria‘  
 zum d'News vom Tag de für üs z'dichte  
 gäb's z'Herlibärg e Ma.  
 „No Billag“ heisst schlussändlech de  
 „Swiss-Fake-News“, made am Zürisee.



Für Musig, Bilder, e Skulptur,  
 fahrsch um die halbi Wält.  
 Konzärt, Theater, Literatur  
 choscht fei e Huffe Gäld.  
 Kultur isch hüt global,  
 d'UNESCO mischt sech i,  
 wählt d'BASLER FASNACHT – doch, das Mal  
 sy d'BÄRNER ehnder gsy:  
 Mir gönne de Basler die Ehrig gärn!  
 Hei lang scho ds WÄLTKULTURERB BÄRN!



„Mis Buebli da im Chinderwage“,  
 e Muetter schwärmt entzückt:  
 „isch ds Beschte, Schönschte, ohni z'chlage,  
 Alls wo n'es Härz beglückt!  
 Es tööpelet zwar alls a,  
 u töippelet“, wird gseit,  
 „wenns nid grad gitt was's möchti ha,  
 sig's nid uf ds MÜÜli gheit!“



Dä Schnüsu wird schynt's mal e Lump.  
 Wie heisst er ächt? Donaldli... → Trump!

Dr Samichlous u dr Schmutzli, die läbe  
im Hüttli im Märiwald.

Dr Schlitte isch parat dernäbe  
mit allem wo Chind e so gfallt.

Doch wo sie z' Bärn sy g'landet,  
es trifft se fasch dr Schlag –  
da secklet e Möite, sälttsam gwandet,  
e richtigi Chlouseplag!

*Der Stapi als „Santa“ rennt mit, lach'sch di tot,  
zwar inn' geng no grünen – aber usse..? Zündtrot!*



Zum Dessärt:

D'Wältelite diskutiert  
global am WEF z'Davos;  
de wird es still, u n'es marschiert  
Eine ine, dä dünkt's är sig GROSS.  
Liest är ne jitz d'Levite?

Blast är dr Wält dr Marsch?  
Ke Red', es schlüft die ganz' Elite  
Däm Ma fasch vo sälber i...

*Alli mini Änteli, schwümme hingedrah,  
d'Chöpfli chöi si nid bruuche,  
Füdü hei sie kes gha.*